

Mbanjranz Miz Bienqvaq

家乡的变化

Gaijgwz hailangh 40 lai bi doxdaeuj, ginghci Cungguek hwngh-fwdfwd, ndwenngoenz vunzlai ngoenz ndei gvaq ngoenz, ndawbiengz miz bienqvaq, hawsingz miz bienqvaq, mbanjranz gou goj miz bienqvaq moq lailai.

Gou cei q geiq ndaej, doenghbaez dou dauq ranzcoj gvaq cieng, gwnz loh cungj dwg naezsa, ci hai gvaqbae namhsa mbinfoenfoen, da cungj hai mbouj ndaej bae. Roenloh gumzgumz gamxgamx, baez ma ranz couh caeuq naengh gosanhceh ndijgaen. Gumz-boengz gwnz loh lailai, bungz daengz ne dungxsaej cungj yaek deng daenh okdaeuj. Fwn doek couh myagmatmat. Hoeng ngoenzneix, roennaiez bienq baenz roenlaux ligcing, gvangqlangh bingzbwd, hai ci gvaqbae youh maenh youh vaiq, doenghbaez aeu aen cung ndeu, seizneix ngamq 20 faen cung couh daengz lo.

Mwh boh gou doekseng, dwg byai



20 sigij 70 nienzdaih, boh naeuz gou nyi gvaq, mwh iq de bae doegsaw hoj lai, gyausiz yaez lai, fwn doek couh laeuh raemx, ndaw gyausiz venj miz gaiq hwzbanj mboepmboep mbapmbap

ndeu, ndawde miz geij aen daiz, dekdadtat. Seizneix raeuz daih vunz neix vuenyungz lai gvaq, guekgya naeuz bouboux cungj aeu doeg sat siujyoz caeuq cuhcungh, haujlai hag-

dangz cungj hwnq miz laeuz sonsaw lai yiengh yunghcawq, lauxsae ndaej yungh dennauj, gauhcingh douz-yingyiz caeuq doxgaiq daihmoq daeuj sonsaw, hawj raeuz hag ndaej engq lai rox ndaej engq lai.

Mbanjranz goj bienqvaq lailai. Doenghbaez, vunzlai youq ranzvax, ranzhaz, ndwenngoenz hoj lai. Ngoenzneix, lajmbanj hwnq ranzlaeuz lig, ca mbouj lai ranzranz miz ci. Ndw mbanj lij guh haujlai doenghyiengh hawj vunzlai guh' angq lienhdang, lij miz dieg cienmonz hawj boublaux guh' angq lienhdang dem, hawj boublaux gvaq ndaej ndei lai di.

Youq aen seizdaih vuenyungz neix, raeuz gwn imq daenj ndei mbouj you saek yiengh. Raeuz aeu doiq ndaej hwnj guekgya, guh ndei saeh dangq-naj, haengqrengz doegsaw, guh boubvunz maenh'ak.

(Nanzningz Si Auvaz Siujyoz Ciz Swjyenz raiz Yangz Yenlinz hoiz.)

Mbawdamj Gou

我的毛毯

Mwh gou bi ndeu, daxmeh cawx mbaw damj miz doz duzdouq ndeu hawj gou, ndei yawj raixcaix. Gaxgonq, de goemq daengx ndang gou ndaej, hoeng seizneix ngamq goemq ndaej byongh ndang gou, caemhcaiq saek de menh-menb bienq damh, daj saekndingfug bienqbaenz saekndingmaeq daegbied damh. Gak swix baihgwnz mbawdamj lij gon geij cong, sojmiz conghgon cungj deng daxmeh aeu baengz saekheu nyib hwnjdaej, yak yawj raixcaix.

Ngoenz ndeu, gyoengq doengzhag daeuj ranz gou guhcaemz, yawj mbawdamj gou, gyoengqde hainduj riu gou:

"Mwngz yawj, de heuh gaiq baengz haenx guh mbawdamj, haha! Caen dwg-riu!"

"Dwg ha, baenzneix yakyawj ha!"

.....

Dingqnyy gyoengqde gangj, gou hojsouh raixcaix, caen naemj hawj mbawdamj gaeuq neix daj aen seiqgyaiq neix siu bae! Caj gyoengqde dauqranz le, gou couh gouz daxmeh cawx mbawdamj moq hawj gou. Daxmeh naeuz, dangh-naeuz gou hab seiz hab soq guh sat sojmiz hanghmoeg gwnz mbaw biuj hag saw dajveh ndwen neix, couh cawx mbawdamj moq hawj.

Vih mbawdamj moq, gou ngoenz-naengz nyinhcaen bae guh hanghmoeg gwnz mbaw biuj dajveh, cigdaengz miz ngoenz ndeu lauxsae youq dangz yawjsaw gangj cekveh 《Daxgoeng Itdingh Miz Banhfap》hawj dou. Cek saw neix hawj gou naemj daengz daxboh ngoenznaengz hwnq romh dauq laep, roengzrengz

guh hong caeuq daxmeh gaenxmbaet guenj ranz, yienghneix gou gaij cawjeiq lo. Gou yaek lumj daxgoeng ndaw gojgaeq nei, bonjfaenh doenghfwngz gaijguh mbawdamj.

Cuengqhag dauq daengz ranz, gou ra faggeuz, fagcik, bitsaek caeuq mbawdamj gaeuq okdaeuj, hainduj gaijguh mbawdamj. Daih' it, gou bubingz mbawdamj youq gwnzdieg, youh aeu mbaw gaen seiqfueng ndeu coq baihgwnz de. Yienzhaeuh gou yungh fagcik caeuq bitsaek ciuq henz mbawgaen seiqfueng veh sienq, riengzlaeng yungh faggeuz siujsim sisi ciuq diuzsienq veh ndei daet gijlai mbawdamj roengzdaej, mbaw damj iq miz doz duzdouq ndeu couh yienghneix guh baenz lo!

Daxmeh roengzban dauqranz, gou couh gip mbouj ndaej aeu mbawdamj gou guh okdaeuj hawj daxmeh yawj. Daxmeh doeksaet cam: "Lwg ha, neix dwg mwngz gag guh lwi? Baenz dahraix ha!" Gou sing hung naeuz: "Dwg ha, daxmeh. Gou mbouj aeu mbawdamj moq lo, neix couh dwg mbawdamj moq gou."

Daxmeh lumh gyaey gou, sim' angq riu naeuz: "Lwggvai, mwngz caen maj-hung lo, rox insik doxgaiq lo." Gou hix sim' angq riu lo, couh lienz duzdouq gwnz mbawdamj hix vuenheij riu lo.

Daj ngoenzneix hainduj, mbawdamj iq neix couh itloh youq gyaeymbonq gou, lumjbaenz daxmeh seizseiz buenx gou.

(Huzbwz Si Vujhan Si Dahingh Daih' it Saedniemh Siujyoz ngeih nienzgaep Cwngz Cujhanz)

Gyaeqgaeqdoj Nanzlumz

难忘的土鸡蛋

Ndaw ndwenngoenz majhung gou sou gvaq haujlai huqlaex, hoeng miz faenh huqlaex ndeu hawj gou ciuhvunz nanzlumz.....

Mwh gou hwnj banhung youwzyenz, miz baez ndeu baenz feiyenz. Gou ngoenznaengz youq yihyen diuqcem, mwhhaenx dwg gvaq cieng doekgonq, daxboh daxmeh nyaengq hwnjban, ndaw rugvunzbingh hoengqvangvang dan miz daxdaiq buenx gou ndwi.

Ngoenz ndeu, miz vunz gvaek dou rugvunzbingh, gou laihnaeuz dwg husw ne, byawz rox daxdaiq haidou baez yawj, mbouj dwg husw, cix dwg boub baengzyoux ndei gou—Cingzcingz. Raen de daengx ndang dumzsubsub, yawj laezvij gwnz haiz, de haengjdingh byaij gvaq duenh roen uq ndeu. De mbouj dwg youq lajmbanj ma? Gou geizheih cam de: "Mwngz guhlawz daeuj ne?" Cingzcingz madmad raemxfwn gwnzgyaeuj, riunyumjnyumj naeuz: "Daxgoeng daiq gou daeuj, dingqnaeuz mwngz baenz gijmaz yenz, gou couh daeuj yawjyawj mwngz. Mwh byaij roen aenliengj deng ci vaih lo, daxgoeng gou youq baihlaj caj gou ne!" Cingzcingz gangj sat, mbon song aen gyaeqgaeqdoj ndawdaeh okdaeuj, oet haey ndawfwngz gou bae, naeuz: "Neix dwg mehgaeq ranz gou gag ok, hom raixcaix! Soengq hawj mwngz, muengh mwngz ndei vaiqdi, gou bae gonq lo!" Caengz gangj sat, Cingzcingz couh vadvad fwngz, byaij ok rugvunzbingh, lienz aen liengj ndeu cungj gaenj mbouj gip dawz.

Gou byaij daengz henz cueng, yawj raeblaeng Cingzcingz caeuq daxgoeng de yied bae yied iq, caiq yawjyawj song aen gyaeqgaeqdoj deng gaem ndat haenx, sim gou raejrubrub. Ngaiz-banringz ngoenzhaenx miz song aen gyaeqgaeqdoj neix, hom raixcaix.

Gvaqlaeng, gou caeuq Cingzcingz caiq mbouj dox-raen gvaq, hoeng yiengh naj riunyumjnyumj de caeuq gyaeqgaeqdoj homfwtfwt, gou daengx ciuh nanzlumz.....

(sam nienzgaep Cinz Swjmuz)

